



REPUBLIKA E KOSOVËS
REPUBLIKA KOSOVA – REPUBLIC OF KOSOVO
GJYKATA SUPREME E KOSOVËS
VRHOVNI SUD KOSOVA – SUPREME COURT OF KOSOVO

Numri i lëndës: 2022:241480

Datë: 11.07.2024

Numri i dokumentit: 05928911

AC-I-23-0112

Në ankesën e

Paditësi

I S, nga Prishtina.

kundër

E paditura/Ankuesja

NSH.New C0 "Grand Hotel SH.P.K", (në likuidim) të cilën e përfaqëson Agjencia Kosovare e Privatizimit, Rr. "Dritan Hoxha", nr. 55, Lakërishtë, Prishtinë

Kolegji i Apelit i Dhomës së Posaçme të Gjykatës Supreme të Kosovës për çështje që lidhen me Agjencinë Kosovare të Privatizimit (DHPGJS), i përbërë nga Mr.sc. Sahit Sylejmani, gjyqtar kryesues, Shkelzen Sylaj dhe Ilmi Bajrami, gjyqtarë, duke vendosur lidhur me ankesën e të paditurës të paraqitur kundër Aktgjykimit të Shkallës së I-rë të DHPGJS-së, C-IV-15-1105 të datës 02 shkurt 2023, pas seancës vendimmarrëse të mbajtur më 11 korrik 2024, lëshon këtë:

A K T G J Y K I M

- 1. Ankesa e të paditurës refuzohet si e pabazuar.**
- 2. Vërtetohet Aktgjykimi Shkallës së I-rë të DHPGJS-së, C-IV-15-1105 i datës 02 shkurt 2023.**
- 3. Nuk caktohen taksa gjyqësore për procedurën ankimore.**

Rrethanat procedurale dhe faktike

Me 19 qershor 2015, paditësi e dorëzoi në DHPGJS një ankesë kundër vendimit të Autoritetit të Likuidimit PRN173-02656, të datës 18 maj 2015, me të cilin ishte refuzuar si e pa vlefshme kërkesa e paditësit e datës 20 mars 2015 për pagesën e pagave të pa paguara në shumë prej 649.71 euro, nga NSH "New Co Grand Hotel", Prishtinë për periudhën 25 maj 2009 deri më 15 qershor 2011, me arsyetimin se kërkesa është parashkruar në bazë të nenit 608 të Ligjit të Punës së bashkuar.

Paditësi me ankesë e kundërshton vendimin e ankimuar duke pohuar se nuk qëndron konstatimi se kërkesa është parashkruar. Ai pohon se kërkesat në bazë të nenit 371 të LMD-së parashkruhen në afatin prej pesë viteve, ndërsa natyra e kërkesës që ka të bëjë me ushqimin në bazë të nenit 373.3 të LMD-së nuk parashkruhet. Tutje paditësi në ankesë pohon se në këtë ndërmarrje ai ka punuar në periudhën e cekur pavarësisht se kush ishte pronari, ndërsa AKP-ja e ka pasë në menagjim këtë ndërmarrje, dhe nuk i ka kryer obligimet ndaj punëtorëve. Tutje ai pohon se me shkresën e AKP-së nr.246 të datës 07.08.2012, janë njoftuar punëtorët se kërkesat për paga në mënyrë meritore do të shqyrtohen nga Autoriteti i Likuidimit në procedurën e likuidimit. Bashkë me ankesë paditësi ka dorëzuar, vendimin e Autoritetit të Likuidimit, listën e llogaritjes se pagave të pa pagave për periudhën 25 maj 2009 deri më 15 qershor 2011, në shumën 649.71 euro nga Komisioni i të paditurës të datës 11.11.2014, llogaritja e kontributit të pa paguar për periudhën e vitit 2010, 2011 në shumën 295.52 euro, të datës 11.11.2014, pasqyrën e llogarisë së trustit, disa kontrata të punës të lidhura me NSH-në dt. 08.04.2009, 22.12 2009, 02.01.2010, 01.10.2010 dhe pasqyrën e llogaris bankare.

Me 22 dhjetor 2022, AKP-ja e dorëzoi në DHPGJS-ë mbrojtjen në ankesë. Në mbrojtjen në ankesë AKP-ja pohoi se Autoriteti i Likuidimit ka kryer një vlerësim të saktë të rrethanave faktike dhe ka zbatuar në mënyrë të drejtë dispozitat ligjore. AKP-ja në parashtresë të mbrojtjes ka pohuar faktin se NSH,, New Co Grand Hotel shpk" ka hyrë në procedurë të likuidimit me datë 02.02.2015, ndërsa paditësi më datë 20 mars 2015 ka ushtruar kërkesë për kompensimin e pagave të pa paguara, në shumën 649.71 euro për periudhën 25 maj 2009 deri më 15 qershor 2011. Në këtë parashtresë AKP-ja pohon se paditësi ka dështuar të paraqesë cila dispozite ligjore e Ligjit të AKP-së është shkelur me vendimin e Autoritetit të Likuidimit. Tutje AKP-ja pohon se kërkesa është parashkruar në kuptim të nenit 608 të Ligjit të Punës

së Bashkuar, pasi që paditësi nuk ka sjellë ndonjë dëshmi që i ka kërkuar këto paga më par në ndonjë gjykatë kompetente. Pasi që kërkesa është parashkuar, AKP-ja pohon se Autoriteti i Likuidimit nuk ka pasur mundësi t'i shqyrtojë meritat e rastit. Nga këto arsye, AKP-ja kërkon që të refuzohet ankesa si e pa bazuar.

Me 02 shkurt 2023, Shkalla e I-rë e DHPGJS-së me Aktgjykimin C-IV-15-1105, ankesën e paditësit e ka aprovuar si të bazuar, e ka ndryshuar vendimin e ankimuar të Autoritetit të Likuidimit si dhe ka obliguar AKP-në ti paguaj paditësit I S në emër të pagave të papaguara për periudhën 25.05.2009 e deri 15.06.2011 në shumë prej 649.76 euro, të cilat do të paguhen në bazë të nenit 40.1.1.7 të Shtojcës së Ligjit të AKP-së. Shkalla e I-rë e DHPGJS-së ka arsyetuar se kërkesa për pagat e papaguara për periudhën nga data 25 maj 2009 e deri me 15 qershor 2011 në shumë të përgjithshme 649.71 euro nuk është parashkuar siç konstaton në mënyrë të gabuar Autoriteti i Likuidimit, pasi që Shoqata sindikale e punëtorëve të NSH-së me datë 20.02.2012 e kishte paraqitur kërkesën në emër të punëtorëve në AKP-dhe kishte kërkuar pagesën e pagave të papaguara të punëtorëve. Kjo kërkesë e ka ndërprerë rrjedhën e parashkrimit të kërkesës dhe nuk mund të konsiderohet se kërkesa është parashkuar. Tutje shkalla e I-rë konstaton se me Përgjigjen e AKP-së të datës 07.08.2012, vërtetohet fakti se AKP-ja ka qenë e njoftuar me situatën e mos pagesës së pagave të punëtorëve të NSH-së, si kundër që me këtë përgjigje punëtorët janë njoftuar se kërkesat e tyre për paga do të shyrtohen në procedurën e likuidimit. Tutje shkalla e I-rë konstaton se në bazë të Listës së pagave të papaguara, vërtetohet se NSH-ja këtij ankuesi i ka mbetur borxh në periudhën e cekur në shumë prej 649.71 euro. Ankuesi po ashtu ka sjellë dhe një Kontratë pune të vitit 2007. Me këto prova vërtetohet se ai ka kryer shërbime pune për NSH-në në periudhën e cekur, andaj është aprovuar shuma në emër të pagave të papaguara prej 649.71 euro që do të paguhet në bazë të nenit 40.1.1.7 të Shtojcës së Ligjit të AKP-së.

Me datë 23 shkurt 2023, AKP-ja e dorëzon një ankesë të afatshme kundër Aktgjykimit të Shkallës së I-rë të DHPGJS C-IV-15-1105 të datës 02 shkurt 2023, dhe kërkon nga Kolegji i Apelit që të aprovohet ankesa e tij si e bazuar, të ndryshohet Aktgjykimi i ankimuar, të refuzohet padia e paditësit si e bazuar dhe të vërtetohet Vendimi i ankimuar i Autoritetit të Likuidimit. Për më tepër në ankesë AKP-ja ka pohuar se me Aktgjykimin e ankimuar nuk është vlerësuar në mënyrë të

drejtë gjendja faktike, është zbatuar në mënyrë të gabuar e drejta materiale dhe nuk janë marrë në konsideratë argumentet ligjore të dhëna në vendimin e ankimuar të Autoritetit të Likuidimit dhe në mbrojtjen në ankesë. Tutje AKP-ja pohon se gjetjet faktike të gjykatës janë tërësisht jashtë kontestit faktik të çështjes dhe plotësisht të pa bazuara në ndonjë dokument që ekzistojnë në dosje të lëndës. Tutje AKP-ja pohon se Aktgjykimi i ankimuar nuk i plotëson kushtet e përcaktuara nga neni 54 i LDHP-së ,pasi që nuk pasqyron drejtë gjendjen faktike e cila ka rëndësi materiale lidhur me kërkesën. Tutje AKP-ja pohon se neni 40.1.6.2 i Shtojcës së Ligjit të AKP-së i jep të drejtë dëmshpërblimi vetëm atyre punëtorëve që janë pushuar nga puna si pasoje apo në lidhje me një veprim të ndërmarrë nga AKP-ja, e që në këtë rast paditësit nuk i është pushuar marrëdhënia e punës me veprimin e AKP-së. Andaj paditësi nuk ka të drejtë në pagat e pretenduara ndaj NSH-së. Tutje AKP-ja pohon se gjykata duhet të lëshohet në shqyrtimin e çështjes dhe të marrë në konsideratë argumentet e ngritura të Autoritetit të Likuidimit.

Me 27 shkurt 2024, paditësi e pranoi ankesën e AKP-së, mirëpo nuk ka dhënë përgjigje në ankesë.

Arsyetimi ligjor:

Ankesa e AKP-së refuzohet si e pa bazuar.

Në bazë të nenit 69.1 të Ligjit nr. 06/L-086 mbi Dhomën e Posaçme të Gjykatës Supreme të Kosovës për çështje që lidhen me Agjencinë Kosovare të Privatizimit (LDHP) Kolegji i Apelit vendosi të mos mbajë pjesën gojore të procedurës.

Merita e ankesës dhe vlerësimi i Kolegjit të Apelit

Aktgjykimi i ankimuar i Shkallës së I-rë të DHPGJS-së është i saktë në rezultat dhe në arsyetimin ligjor, andaj duhet të vërtetohet.

Kolegji i Apelit vëren se paditësi me datë 20 mars 2015 ka parashtruar një kërkesë tek Autoriteti i Likuidimit me të cilën ai ka kërkuar të paguhen pagat e pa paguara për periudhën 25.05.2009-15.06-2011 nga NSH New Co "Grand Hotel" Prishtinë,

në shumë prej 649.71 euro. Kjo kërkesë ishte refuzuar nga Autoriteti i Likuidimit me arsyetimin se ajo është parashkuar në bazë të nenit 608 të Ligjit të Punës së Bashkuar.

Shkalla e I-rë e DHPGJS-së e ka aprovuar ankesën e paditësit si të bazuar, e ka ndryshuar Aktgjykimin e ankimuar dhe e ka obliguar AKP-në të ia paguaj paditësit pagat e pa paguara në shumë prej 649.71 euro, duke konstatuar se kërkesa për paga nuk është parashkuar.

Kolegji i Apelit vëren se paditësi me ankesën e tij të dorëzuar në Shkallen e I-rë ka bashkangjitur: Vendimin e Autoritetit të Likuidimit, listën e llogaritjes se pagave te pa pagave për periudhën 25 maj 2009 deri më 15 qershor 2011, në shumën 649.71 euro nga Komisioni i të paditurës të datës 11.11.2014, Llogaritja e kontributit të pa paguar për periudhën e vitit 2010, 2011 në shumën 295.52 euro, të datës 11.11.2014, pasqyrën e llogarisë së trustit, disa kontrata të punës të lidhura me NSH-në dt. 08.04.2009, 22.12 2009, 02.01.2010, 01.10.2010 dhe pasqyrën e llogaris bankare. Kolegji i Apelit vëren se paditësi për dallim nga punëtorët tjerë të NSH-së nuk kishte bashkangjitur njoftimin për AKP-së dt. 26 mars 2012, kopjen e kërkesës për paga të dorëzuar në AKP, me datë 20 shkurt 2012, dhe përgjigje e AKP-së ndaj Shoqatës Sindikale të dt. 24 korrik 2012. Mirëpo me rastin e vlerësimit të këtyre provave Kolegji i Apelit referohet në dosjen e lëndës AC-I-23-0124 ku gjenden këto shkresa e të cilat të cilat janë paraqitur nga Shoqata Sindikale në emër të gjithë punëtorëve të N.Sh-së.

Në bazë të këtyre provave vërtetohet se Shoqata Sindikale e Punëtorëve të NSH-së me datë 24 korrik 2012 e kishte paraqitur një kërkesë në emër të punëtorëve në AKP, duke kërkuar prej saj që të paguhen pagat e mbetura borxh për periudhën e cekur.

Në bazë të kësaj kërkesë AKP-ja me datë 06 gusht 2012 e kishte paraqitur një përgjigje për Shoqatën Sindikale të punëtorëve të NSH-së, në të cilën përgjigje AKP-ja i referohet kërkesës të datës 24 korrik 2012 dhe i udhëzon punëtorët që kërkesat për paga do të shqyrtohen në procedurën e likuidimit, pasi që NSH-ja të hyje në likuidim.

Duke u bazuar në këto prova, Kolegji i Apelit e mbështet konstatimin e Shkallës së I-rë të DHPGJS-së se kërkesa nuk është parashkruar siç pretendon Autoriteti i Likuidimit në vendimin e ankimuar. Tutje Kolegji i Apelit vëren se AKP-ja në përgjigjen në ankesë nuk e ka kontestuar shprehimisht lartësinë e kërkuar të kompensimit në emër të pagave të pa paguara, andaj duke u bazuar në këtë fakt dhe në listën e pagave të cilën paditësi e ka sjell me ankesë, Shkalla e I-rë e DHPGJS me të drejtë e ka aprovuar shumën e kërkuar prej 649.71 euro, në emër të pagave të pa paguara për periudhën e cekur, e cila shumë do të paguhet nga ana e AKP-së, sipas prioritete të përcaktuara me ligj në procedurën e likuidimit.

Andaj nga këto arsye ,ankesa e AKP-së refuzohet si e pa bazuar, dhe vërtetohet Aktgjykimi i ankimuar i Shkallës së I-rë si i drejtë dhe i bazuar në ligj.

Nga se u tha më sipër në bazë të nenit 9.10 të LDHP është vendosur si në dispozitiv.

Taksat gjyqësore

Ankuesja tashmë e ka paguar taksën gjyqësore për procedurën ankimore me datë 16 mars 2023, andaj nuk do të caktohen taksa shtesë

Lëshuar nga kolegji i Apelit i DHPGJS-së me 11 korrik 2024

Mr.sc, Sahit Sylejmani Gjyqtar kryesues _____